

癸

巳

存

稿

癸巳存稿卷十三

黟俞正變理初

張天師舊事

晉書何充傳云時郗愔及弟曇奉天師道南史沈僧昭傳云僧昭另名法朗少事天師道士魏書釋老志云寇謙之遇大神太上老君曰自天師張陵去世以來無所師授吾故來觀授汝天師之位則天師之號其來已久三國志張魯傳云自號師君以祭酒領部衆多者爲治頭大祭酒其弟衛敗於陽平關魯奔入巴中太祖遣人慰喻魯盡將家出是天師之名由師君得之水經沔水注云湊水南逕張魯治東其西有張

天師堂於今民事之所謂天師者指道陵女仙傳云孫夫人三天法師張道陵之妻也自龍虎山居陽平化子衡字靈真孫魯字公祺世號嗣師太平廣記載傳仙錄云張玉蘭者天師孫靈真女也隋書經籍志史部雜傳有正一真人三天法師張君內傳一卷唐志亦有之云王萇撰唐天寶中封太師冊府元龜天寶七載三月詔亦稱後漢張天師唐時稱三天輔教大法師老學庵筆記云天聖八年賜張天師二十五世孫乾曜虛靜先生號獨賦稅又云大邑鶴鳴觀乃張天師鶴鳴化夷堅戊集云徽宗詔虛靜張天師治同州白蛇虛靜爲漢天師三十代孫宋人言天師子孫世次不同今黃冠輩稱

虛靜爲三十二世蓋或就張子房計之或就張輔漢道陵計之夷堅志云虛靜不娶嫡派遂絕今以族人紹其後元時封爲嗣漢天師有道敎碑史亦有傳至元三品大德二品至大一品明史方伎傳云張正常元時天師洪武元年太祖曰天有師乎改授正一嗣敎真人視二品按王世貞弇州史料云洪武中封張正常爲正一敎主嗣漢四十二代天師後定爲正一嗣敎真人正二品蓋初尙沿元號何喬遠名山藏云成化五年四十六代真人張元吉犯罪擬絕蔭封明史方伎傳云穆宗初改上清觀提點秩五品給銅印萬厯五年復古封江旭奇皇明通紀云隆慶二年停正一真人封授上清觀提

點弇州史料云隆慶中改上清觀提點萬厯中復真人號然
真人提點由於官授民間稱天師自若也順治三年江西撫
臣進正一真人符四十張得

旨朝廷一用天下必至效尤其置之乾隆十二年改二品爲
五品停朝覲筵宴收徵銀印三十一年以請雨升三品五十
四年令五年一次至京嘉慶九年換給三品印二十四年仍
定爲五品道光初停朝覲其印則明鄭曉今言云洪武十三
年於真人銀印外賜以六品銅印曰龍虎山正一元壇之印
以印符錄沈德符野獲編云孝宗時給陽平治都功玉印穆
宗時收之孫承澤春明夢餘錄云宏治時賜陽平治都功印

刻以玉蓋張道陵舊印如此隆慶元年追回萬厯二年復給之今符籙及醮壇榜文皆用都功印按能改齋漫錄云宋仁宗時有安福令林績毀天師三十三代孫嗣宗陽平治都公印字作公夢溪筆談謂之都工字作工云修醮都工簿有施利今實作都功蓋治頭之義其冠以陽平治則女仙傳言之輔漢靈真公期三世所居也

道士官

道士官正六品爲正一從六品爲演法正八品爲至靈從八品爲至義從九品爲都紀其以府分者爲副都紀州爲道正縣爲道會皆未入流龍虎山正一真人舊爲一品康熙二十

二年給誥命

諭云一切僧道原不可過於優崇若一時優崇日後漸加縱肆或別致妄爲爾等識之

符

太平御覽載黃帝出軍訣

七百三十六

有龍魚河圖二符太平廣

記載神仙傳老子以太元清生符與徐甲魏書王早傳授東莞趙氏一符擒得鄭氏男北齊書吳遵世傳云恒山老翁謂之曰與君開心符遵世跪取吞之符者漢時有印文書名道家襲之黃老書乃漢人迹也淮南本經訓云審于符者怪物不能惑是守一之文言非指符錄又道家咒語亦漢式雲麓

漫鈔云急急如律令漢公移常語張天師漢人故承用之道
家遂得祖述野客叢書云此沿漢式如今言文書千里驛行
其言至通符是漢名如律令亦是漢文今道藏書言律令雷
部神名性疾速此與僧說羅刹同一陋謬

神荼鬱律

風俗通引黃帝書神荼鬱律兄弟二人性能執鬼居度朔山
桃樹下引此言者甚多或以爲黃帝書或以爲山海經茶或
作蔡律或作壘義雖太古亦經淺人附會漢蔡邕獨斷云歲
竟畫茶壘并懸葦索以禦凶晉司馬彪續漢書禮儀志云大
儺訖設桃梗鬱儺是專有茶壘或鬱儺一桃木人而不云神

茶神蔡晉葛洪枕中書云元都大真王言蔡鬱壘爲東方鬼
帝語雖不可據然可知漢魏晉道士相傳神蔡鬱壘止是一
神姓蔡名鬱壘漢時宮廷禮制亦以爲一人而通儒及漢時
道家黃帝書皆以爲二人乃知古禮制古儒說古道說各不
相喻也審究其義神茶鬱律由桃椎展轉生故事耳

屏翳

楚辭天問云并號起雨王逸注云屏翳雨師名史記司馬相
如傳大人賦云召屏翳誅風伯刑雨師下又有列缺豐隆則
司馬相如以屏翳爲雲師文選曹子建洛神賦云屏翳收風
川后靜波注引植詒咎文云河伯典澤屏翳司風謂曹指爲

風師選注又引虞喜志林云屏翳韋昭說爲雷師喜則以爲
雨師說屏翳者雖多並無明據今案屏翳似雲而號則爲風
楚詞注蓋誤字韋昭知掌故以爲雷師因號生義而不知并
號自應爲風師天問亦言風號乃起雨也

中元施食

中元施食本道家法藝文類聚道經云中元日作元都大會
於玉京山采諸花果珍奇異物幢幡寶蓋十方大聖齊詠靈
篇囚徒餓鬼俱飽滿免于艱苦得還人中比如富人好善樂
施不必循古法其用七月十五日則道家中元之會也而佛
家學之藝文類聚初學記白帖歲華紀麗並引孟蘭經云目

連救母母不得食馳還白佛佛言須十方衆僧威神之力七月十五日具百味五果著盆中供養大德佛敕衆僧僧皆爲施主咒願云云後人遂爲華飾刻木割竹飴蠟翦綵摹花果之形極工巧之妙今檢釋藏中有晉竺法護譯佛說盂蘭盆經云七月十五日僧自恣時又云七月十五日佛歡喜日僧自恣日以飲食安盂蘭盆中又云年年七月十五日作盂蘭盆施佛及僧按唐元應一切經音義云正言烏藍婆那此言倒懸則單字還音可爲烏藍婆亦云烏拉纏亦云盂蘭盆亦云伊拉纏何爲以盆著花果又以盆施佛僧又佛地自有月法日法當是第五月之末一日不得云七月十五日若佛正

言七月十五日則是中國之八月晦日故知佛用道家中元是僧徒爭分中元之利者爲之也太平廣記載異聞記云唐天寶時任昇之與鄭欽悅

唐書儒學列傳作郭

言梁大同四年七月十

二日得銘其祖昉數日遇孟蘭大會從駕同泰寺則梁時依法護說用七月十五日唐六典中尙署七月十五日進孟蘭盆武后于七月十五日內出一盆楊炯賦云陳法供飾孟蘭青蓮吐而非夏頰果搖而不寒銅鐵鉛錫球琳琅玕映以甘泉之玉樹冠以承露之金盤又其旁爲少君王子女瑤姬鸛鵲鶯鶯鴝鵒翡翠毒龍狂象罔兩魑魅赤霞蓮花之飾綺麗可知矣舊唐書王綰傳云代宗七月望日宮中造孟蘭盆

綴飾鏤珮設高祖以下七聖位冊府元龜崇釋教云大厯三年七月特賜章敬寺孟蘭盆蓋爲盆而從以鰲山之類作佛事者惟此最有實益然是展轉得自道家者也宋孟元老東京夢華錄云中元賣冥器綵衣以竹所三腳如燈窩狀亦謂孟蘭盆挂冥錢衣服於上焚之陸游老學庵筆記云故鄉七月望俗具素饌祀先織竹如盆盎狀貯紙錢承以竹焚之視盆倒所向北則冬寒南則溫東西則得中謂之孟蘭盆此則仿佛法爲之與施食無涉尋釋氏之說餓鬼名面然又名噉口言餓則飢噉出于口而面若然也又言面然爲觀世音變相故有孟蘭觀音譌爲魚籃觀音而又別爲魚籃觀音造一

典故今行六有唐實叉難陀譯佛說救面然餓鬼陀羅尼神咒經一卷淵二有唐不空譯佛說救餓口餓鬼陀羅尼經一卷淵十二有瑜珈集要餓口施食阿彌陀緣由一卷又有後漢譯鬼問目連經佛說報恩奉盆經不知妄作止以爭利又有甘露僧造蒙山施食儀

喇嘛

黃教喇嘛多不循謹天聰七年令喇嘛班第出居城外清淨之所旗民人等有請念梵經治病者家主治罪崇德元年三月

諭曰喇嘛等潛肆姦貪直妄人耳蒙古等深信其懺悔超生

等語致有懸轉輪結布旛之事嗣後宜俱禁止康熙時以鄂爾多斯喇嘛肆詐有

詔窮治捕之發內地爲奴又以喇嘛匿盜著令坐罪康熙三十九年三月

諭曰蒙古惟信喇嘛一切不顧此風亟宜變易倘喇嘛有犯法者卽按律治罪俾知懲戒雍正二年刑部議五臺山喇嘛索納木巴丹強姦民人杜青雲妻王氏王氏持刀詈拒至夜忿極自縊王氏建坊入祠喇嘛比光棍爲首例斬立決著爲令時又以喇嘛欺誑蒙古

命各扎薩克逐之又毀西寧二大黃寺乾隆時衛藏濟仲喇

嘛妄言悞邊事剝黃正法嘉慶十二年達賴喇嘛羅卜藏的
列科派糧物逼死莊頭鄭國泰一家二命復主使鄭珂捏詞
具控奉

旨剝黃斥革

國家之御黃教如此張文端鵬翮使俄羅斯行程錄云康熙
二十七年六月二十七日於喀爾喀地遇番僧言至中國訪
佛不見聞西藏達賴喇嘛似之及往見又非也此番僧甚慧
時達賴于數有所避不出世其事康熙三十二年始發

尼庵議

夥迎霽門外建書院當碧山之陽十里曰碧陽書院舊有尼

癸已存稿

卷十三

八

靈石楊氏栞

庵值書院西南邑人欲爲遷之難其地不果則爲議以告尼
一曰尼庵宜祀本師憍曇彌耶輸陀羅淨檢道馨淨秀及當
庵開山師不當祀佛也西域記秣吐羅國苾芻尼供養阿難
佛國記中天竺比邱尼多供養阿難塔以阿難請世尊聽女
人出家故此非佛及阿難本意亦非尼奉師法也佛本行集
經姨母養育品云摩訶波闍波提是童子正眞姨母釋迦譜
云爾時太子姨母摩訶波闍波提乳養太子梁僧寶唱經律
異相云摩訶波闍波提梁言大愛道隋本行經注云隋言大
慧唐僧元應一切經音義云瞿夷或曰喬曇彌或曰喬達彌
此言明女按瞿夷亦曰瞿多彌或曰喬達摩佛第二妃也此

大愛道正當作憍曇彌佛母之妹國王之次妃本行集經亦謂之國太夫人其命名與瞿夷同取明女明慧好道諸經多譯爲大愛道佛本行集經剃髮染衣品云第二妃瞿夷聖女宛轉大哭時憍曇彌亦然羅睺羅因緣品云憍曇彌爲世尊出家啼哭壞眼此或疑是瞿夷妃事然大愛道于佛恩義至深佛說瞿曇彌記果經云瞿曇彌欲出家三爲世尊所制阿難爲白世尊世尊言女人若出家佛法不得久存中本起經亦云大愛道求出家至三世尊不聽又追至河上阿難爲請是憍曇彌出家因緣最難而尼僧之興實由之因而佛妃耶輸陀羅亦出家妙法蓮華經序品云羅睺羅母耶輸陀羅比

耶尼亦與眷屬俱則明著比耶尼之稱瞿夷之事掩于大愛
道阿難有妹亦出家作比耶尼見法苑珠林引分別功德論
云迦葉訶阿難爲小兒其妹甚嫌之而不出其名西域女人
出家略可指名者佛本行集經有跋陀羅卑梨耶夫婦出家
生經有優鉢羅華比耶尼有暴志比耶尼賢愚因緣經有鋤
蘭比耶尼微妙比耶尼叔離比耶尼金光明比耶尼百緣經
有寶光比耶尼孫陀利比耶尼淨衣比耶尼須漫比耶尼善
愛比耶尼青蓮花比耶尼楞嚴經有寶蓮香比耶尼金紫光
比耶尼又言淫女摩登伽今名性比耶尼雜寶藏經有尸室
比耶尼福田經佛座中一比耶尼名曰柰女佛說大灌頂神

咒有修陀利比耶尼增一阿含經有輸盧比耶尼君荼羅比耶尼波陀比耶尼中阿含經有法樂比耶尼皆在許大愛道出家之後佛本行集經耶輪陀因緣品云波羅柰城長者善覺子名耶輪陀忉利天子降胎也佛國最初成優婆夷者耶輪陀母及婦精進苦行品云軍將女難陀也願作聲聞弟子

佛言如是婆羅

力也

亦言佛亦許之乞食得善女須闍多

善布生

施願作聲聞弟子菩薩言當如所願則又優婆夷聲聞弟子之別也迨尼法立則有佛說五苦草句經云佛告諸弟子善男子善女子汝已出家佛本行集經轉妙法輪品云善男子善女人捨家出家晉譯生經佛說夫婦經云一時有清信士

其婦數數欲出家爲比丘尼墮便聽之證得羅漢佛說義足經子父共會品云諸釋女人亦復聚會俱到佛所是其時出家者俱領于大愛道佛母泥洹經云大愛道闍維畢佛擎舍利鉢曰母能拔興丈夫敕令興廟供養增一阿含經云比丘尼中最初得道者大愛道尼最後得道者陀羅俱夷國尼佛說大愛道般涅槃經云五百比丘尼俱是阿羅漢又云五百比丘尼泥洹俱出東方佛令比丘尼共爲起塔佛母泥洹經云大愛道比丘尼有女沙彌三人除僅女五百人增一阿含經槃涅槃品則云大愛道五百比丘尼又二沙彌尼妙法蓮花經持品云佛姨母摩訶波闍波提與學無學比丘尼六千

人俱摩訶爲大法師六千人俱爲法師耶輸陀羅爲大法師
摩訶受記爲一切衆生喜見如來耶輸陀羅受記爲具足千
萬光明如來又妙莊嚴王本事品云昔淨德夫人今佛前光
照莊嚴相菩薩是是佛時比耶尼已有如來菩薩羅漢而學
無學有六千人翻譯名義集選云橋曇彌此云衆主以出家
爲尼衆主故是六千人皆大愛道橋曇彌主之又與耶輸陀
羅爲兩如來自爲一宗男僧供三佛女僧供兩如來不生染
著于佛意合也其中國出家者唐僧道宣廣宏明集歸正篇
僧法琳破邪論及法苑珠林並引漢法本內傳云明帝時後
宮陰夫人王婕妤等百九十人出家京都治民婦女阿潘等

百二十一人出家帝立十寺七寺城外居僧三寺城內安尼
梁高僧傳云齊僧尙統言漢桓帝時尼衆求受戒不得魏初
東天竺二比丘尼到長安見中土比丘尼與授具戒此乃無
智僧徒僞造以與化胡經爭者梁僧寶唱比丘尼傳云洛陽
竹林寺尼淨檢晉建興中出家洛陽城東寺尼道馨晉泰始
中出家比丘尼誦經馨其始也序云比丘尼之興發源于大
愛道像法東流淨檢爲始按寶唱記道馨事晉泰始乃宋泰
始之誤故序亦始淨檢晉書佛圖澄傳云石虎著作郎王度
奏曰漢聽西域人立寺都邑漢人皆不得出家魏承漢後亦
循前軌晉桓元難王謚書云曩者晉人略無奉佛沙門徒衆

皆是詣胡唐書傳奕傳云漢立胡祠止西域桑門自傳其教
西晉以上不許中國髡髮事胡至石苻亂華乃弛厥禁正建
興時也安得更前有前此後宮出家之事其外國尼來中土者
冥祥記晉桓溫家浴尼宋臨川王尼曇輝晉簡文時尼竺道
容建興時吳縣東靈寺帛尼梁高僧傳宋景福寺尼慧果淨
因共請仇那跋摩曰過去六年有師子國八尼至京言宋地
先未有尼那得二眾受戒戒品不全又人不滿別因西域
人請外國尼來足滿十數于定林下寺結夏安居是尙未有
尼寺廣宏明集統歸篇載梁江總記其祖母張氏于宋初隨
父張恭子在廣州事尼法瓊僧行篇載梁沈約作淨秀行狀

云本于青園寺出家宋大明七年思別立住處初置精舍泰
始三年明帝賜號禪林制龕造像寫集衆經招納同住十有
餘人則尼自立寺實始宋泰始故宋後廢帝紀有往青園尼
寺偷狗就曇度道人煮之飲酒之事是宋時尼始有寺尼庵
宜祀出家本師僑曇彌從出家本師耶輸陀羅此二如來也
又祀中國出家本師淨檢中國出家誦經本師道馨中國出
家別立住處本師淨秀當庵開山本師某尼

一日尼自有庵當自立法不當受男僧節制也佛說瞿曇彌
記果經云女人當行八重法女人不得犯女當盡命于比耶
也比耶尼僧祇律波羅提木叉戒經云漏心男子肩以下膝

以上摩觸受樂者漏心男子伸手內住共語受捉手捉衣來
歡喜請坐曲身就共去期者不應共住又云捉戶鉤開他房
戶共男子住與受具足者與一比邱空靜處坐者與丈夫屏
處坐者與男子伸手內住若耳語者知閨中男子坐無燈而
入者波夜提然又云知僧和合而已如法又云比邱尼欲破
和合僧諸比邱尼應諫則爲尼甚難生經佛說旃闍摩暴志
謗佛經云舍衛比邱尼暴志木魁繫腹似身懷孕因牽佛衣
君爲我夫從得有身不給衣食佛說興起行經云多舌童女
舞杆起腹謗佛淫已使已有身佛乃化鼠嚙衣落杆經律異
相摩那祇全身入地獄經云摩那祇懷杆謗佛法顯傳云外

道女旃遮摩那懷衣著腹似妊謗佛西域記云戰遮婆羅門女懷木杵謗佛此本不得志之尼所爲生經明著爲尼而外經論諱之賢愚因緣經波婆梨緣品云彌勒欽仰佛跡有比丘尼持一死蟲著佛跡處言看斯跡躡殺衆生有何妙哉人方以尼謗佛尼又自起謗故佛待之最嚴又初無尼寺晉法汰比丘尼戒本所出本末序云外國法尼不得獨立是也中國自宋泰始有尼寺則尼必當獨立五代會要云唐天成二年六月七日敕官中告援齋會外不計齋前齋後僧尼不得輒有相過如敢故違準奸匪例處斷不得僧于尼寺內開講如敢故違僧徒三年尼逐出城或僧尼不辨宣傳法會重杖

處死五代史周書世宗紀云顯德二年五月甲戌詔寺院僧尼各留一所兩所亦別居也燕翼貽謀錄云開寶五年十二月丁丑詔尼合度者只許于本寺起壇受戒違者重罪許人告本寺者尼寺也其後奸僧反引此詔謂尼不至僧本寺受戒爲有重罪尼亦信以爲然陰雖係陽僧尼無夫婦法又不同居與佛時異則僧不得牽引無尼寺以前佛語抑制尼且佛初意不度尼正以僧尼同居之故隋書經籍志云佛言滅度後正法五百年象法一千年末法三千年言正法五百年者佛母泥洹經云佛言正法當住千年以度女人今止五百年善見律云佛何以不度女人爲敬法故以度女人減五百

歲其言敬法猶非佛旨依般若經初分二分緣起品俱云佛與五百比耶尼俱又法炬諸德福田經云佛與四比耶一比耶尼及天帝釋各說所得果報增一阿含經力品云輸盧比耶尼降伏六師大灌頂神咒佛爲修陀利比耶尼等被惡鬼嬈召須彌山七萬鬼神大海中五萬鬼神護之則敬法可度尼佛以度尼依僧異見者生謗僧又內肆正法所以減損西域記云摩揭陀國兩菩薩像耆舊傳言此像身沒不見佛法當盡今南隅菩薩沒過胸臆西陽雜俎云西域佛金剛坐有標界銅觀自在像兩軀國人傳言像埋佛法盡隋末已沒過胸臆其事有徵驗古于闐多高僧今和闐無信佛者廓爾喀

有佛故迹今紅教行不高又衛藏紅教制于黃教乃末法之
驗佛說瞿曇彌記果經云佛告阿難佛剎中不可容女人終
不得五事不得成如來謂男僧不得也中阿含經云若使女
人捨家學道令此梵行不得久住猶如人家多女少男此家
爲得轉興盛耶法滅盡經云佛告阿難我泥洹後奴爲比耶
婢爲比耶尼無有道德淫佚濁亂男女不別令道淡薄皆由
斯輩妙法蓮花經提婆達多品云女身垢穢非是法器猶有
五障不得作梵天王帝釋魔王轉輪聖王佛身謂尼有五障
者不得也大智度論迦葉謂阿難有罪佛意不欲聽女人出
家汝勤勤請佛聽爲道以是之故佛之正法五百歲而衰則

佛于度尼之事有隱憾焉尼能自立不依僧爲佛思議所不及亦所以報佛恩也

一日尼庵待弟子宜寬也善戒經云僧二百五十戒尼三百四十八戒比丘尼戒本所出本末云舌彌持五百戒唐元疑甄正論云僧二百五十戒尼五百戒而晉道安比丘尼大戒序云尸父屬賴尼有百七事曇摩侍本有百一十事與龜茲國舌彌大戒本應謂比丘戒不止二百五十阿姨戒不得止五百法汰序云女人之心弱而多放佛達其微防之宜密故倍男也實則尼戒以淫恣爲重然非違人情苦禁錮之楞嚴經云阿難言寶蓮香比丘尼私行淫欲乃言行淫非殺非偷

無有業報發是語已先于女根生大猛火節節燒然此業火
自燒也若佛立大法則歸和平比丘尼僧祇律波羅提木叉
戒經云沙彌尼說如來說淫欲是障道法我知習淫欲不能
障道比丘尼應諫之邪見不舍者驅出無他罪也又云受使
和合男女私通有罪蓋以寄夫托妻導淫爲罪戒經立意甚
深也謂之尼者佛國女曰夷信佛女曰優婆夷出家女曰苾
芻夷苾芻者苦行乞食僧譯之曰除饑明度無極經音義引
分別功德論云世人飢饉于色欲除此愛又引康會注法鏡
云凡夫貪六塵猶餓夫夢飯故號出家爲除饑釋迦氏譜引
康會注法鏡云聖斷六情饑饉故得號焉今法鏡經無此注

梁僧佑出三藏記集云舊經除饑男除饑女新經比耶比耶
尼實則苦行乞食僧忘其訓乃夸言之尼則苦行女也昔人
立意苦行今多買充責以苦行則非本願故不宜求之過急
尼依男僧則爲垢穢今自有業可得從容妙法蓮花經五百
弟子受記品云法明如來時無有女人藥王菩薩本事品云
日月淨明德如來時彼國無有女人佛說如幻三摩帝無量
印法門經云勝華藏菩薩白佛言彼佛刹中有女人否佛言
不也彼佛刹中尙無女人名字可聞況女人耶其中生者皆
是化生清潔淨白咸修梵行一切衆生皆以法喜爲妻禪悅
爲食此自與男僧言之曇摩識譯大方等大積經陀羅尼品

云菩提自在梵王正語梵天皆現女身說咒授記品云莊敎
華魔王誓以女身廣度衆生說咒護法則尼亦能自立妙法
蓮花經提婆達多品薩曇分陀利品俱言龍女變爲男身佛
說義足經劫比陀國蓮花色比耶尼分云化作金輪王法華
三昧經云羅閱王女利行見佛出家作沙門化爲男子一時
佛剎中無有女人晉法顯傳云優鉢羅比耶尼化身禮佛又
有曇摩密多譯佛說轉女身菩薩經云五百比耶尼七十五
居士婦遂成男子則尼可爲男秦譯龍施女經云龍施女變
成男子佛說長者法志妻經云妻及下使皆轉男唐義淨譯
金光明最勝王經云佛爲寶光曜女說法領解轉成梵身佛

爲授記隋闍那崛多譯月上女經云以華供佛發十願卽得
記轉男身爲月上如來賢愚因緣經貧女難陀緣品云波塞
奇王女名曰牟尼卽今釋迦文佛梁僧伽波羅譯菩薩藏經
云佛在大光明聚如來時爲竭伽佗天女受持此經卽轉男
身若有女人聞此如來名卽不更受女身又檢開元釋教錄
有彌勒爲女身經後漢失譯者梁僧唱經律異相卷十引有
之尤爲近古可信女身可受記爲如來可化爲金輪王可轉
身爲釋迦文佛爲彌勒佛是當優游以求之者也嘉慶十有
五年十月十六日

佛教斷肉述義

佛教斷肉乃梁武帝法其先亦有漸義禪秘要法經云若食肉時洗令無味佛飭修禪得食三種清淨之肉唐西域記云摩揭陀國雁塔言小乘漸教開三淨之食三淨食三種清淨肉雁也鴈也鹿也其說非是諸經要集云疑見疑聞不爲己殺鳥殘自死得聽食之毗尼律云離見聞疑不爲己殺鳥殘自死者開聽食之楞嚴經云不見爲我殺不聞爲我殺不疑爲我殺也及自死也鳥殘舍也三是也求不殺之義非始于佛洛陽伽藍記云魏神龜二年七月二十九日僧惠生與宋雲至朱駒波國人民山居不立屠殺食肉者以自死肉是人間本有此俗佛用之爲漸教廣宏明集梁武帝斷酒肉文云諸

僧尼言律中無斷肉事及懺悔食肉法制言律先明斷十種不淨肉次言食三種淨肉如此漸制便是意欲永斷唱斷肉經竟制云僧道小輩看經未徧互云無斷肉法故涅槃經云若乞食得肉以水洗之味與肉別然後得食根本說一切有部目得迦部云夜分有電傷禽獸苾芻夜出堪食者咸持歸卽三淨之義賢愚因緣經摩訶斯那優婆夷緣品云摩訶斯那割股裏肉食病比丘其夫謗佛佛戒比丘何乃受不淨食比丘之法淨肉應食若聞見疑者三淨亦不應食優婆夷言佛以我故制諸比丘不得食肉則三淨佛亦不定根本說一切有部目得迦部云苾芻食狗肉爲狗所嗅吠佛言不應食

狗誠以事難驟斷故隨事立制尼陀那云鄔婆離言苾芻爲
病得食肉者何處取之佛言于殺羊鷄豬捕鳥獵獸者蓋鳥
獸自死藏毒傷人有病苾芻不拘三淨佛立法亦不得不恕
也楞伽經言不應食肉有十因緣二者屠者雜賣三不淨氣
分所生長佛法五戒魏書釋老志止言戒飲酒其斷肉當在
戒殺中笑道論引老子序云佛不飲酒以女人飲酒犯七出
實則以酒亂性故戒之其素食惟持齋日後漢書楚王英傳
云學爲浮屠齋戒祭祀詔還贖繯以助伊蒲塞

卽優婆塞時
漢人聽法者

桑門

西域人
卽沙彌

之盛饌言王尙浮屠仁祠潔齋三月與神爲誓

三月乃佛家結夏佛家齋日止此高僧傳云宋時杯渡不甚

癸巳存稿

卷十三

六

靈石楊氏栞

持齋飲酒噉肉至於辛鱸與俗不殊則結夏亦不斷肉又云
梁時寶誌于臺城對武帝食鱸武帝曰朕不知味二十餘年
矣又其時僧飲酒食豬肚梁武亦不能驟斷梁武所謂斷肉
經者時制唱涅槃經云受肉之時作子肉想又云食肉者斷
大慈悲我從今日制諸弟子不得食肉一切悉斷及自死者
制謂涅槃爲此說者立言將謝則大明惻隱貽厥將來其後
唐譯楞嚴經云佛告阿難我令比丘食三淨肉此肉是我神
力化生本無命根我滅度後食衆生肉縱得心開報終必沈
生死苦海乃本梁武制義推衍得此說又按鴛掘摩羅經云
自死牛革作屣施文殊師利問受不受佛言若不受者是比

耶尼法若受者以其展轉離殺因緣唱斷肉經竟制則云法
寵言自死肉不得食則不得著革屣制言革屣經久食噉便
害無量身命是梁武帝用鴛掘摩羅經文又進言之又唐道
宣感應記天人言佛說著蠶衣者是魔法我成道至涅槃惟
服麤布白氎三衣未著綰帛則後人託佛說愈求其深梁武
帝斷肉敕云不曾見禽獸有一自死者若非殺生豈有死肉
買肉自殺其罪一等衆僧食肉罪劇白衣其託義大乘歷難
三淨能使佛徒斷肉亦其沈毅也唐武氏自戊戌歲五月禁
天下屠殺至庚子歲十二月始開禁又非梁氏所能及矣其
在梁武前者牟融理惑論云道家避穀而飲酒啖肉佛以酒

肉爲上戒而食穀高僧傳云晉支遁幼時與師論鷄卵未足爲殺師亡後見形投卵于地殼破雛行頃之俱滅遁乃感悟蔬食終身魏書釋老志云沙門智嵩往胡地絕糧弟子求得禽獸肉嵩以戒自誓餓死酒泉西山南齊則武帝喪用素食周彥倫長於佛理終日長蔬食而何允亦精信佛法斷食生猶欲食肉白魚鮓卽鱖字脯糖蟹紀聞太平廣記云北齊稠禪師與人鬥不勝夢金剛與以筋不能食曰斷肉故耳異苑云永初二年竺惠熾卒後見形言生不斷肉今落餓狗地獄令知有報則古亦或有之而西土反無此說西域記云拘尼那揭羅國言羅怛羅爲護正法未入寂滅言數百年未嘗乳味則斷

肉者佛子一人又云阿耨尼屈支等食三淨尚滯漸教求法
高僧傳云有一人與北道使至縛渴羅國出家師使食三淨
言如來大師親開五正我依三藏律有成科若引大乘非吾
所聞明史眞臘傳云俗尚釋教僧皆食魚肉或以供佛今則
西僧味取濃厚更無取三淨又劫殺生人取皮骨作器不戒
殺也梁武帝所以決棄三淨者以何承天顏延之周彥倫之
論宏明集何承天荅顏光祿書云將使自已不殺抑亦受教
咸同若取足市廛恐雅論之不可立矣顏延之釋何衡陽書
云好生惡死每下愈篤故宥其死者順其情奪其生者逆其
性至人尚矣何爲犯順而居逆哉不能頓奪所滯故因爲之

制耳南齊書周彥倫與何允書云鼎俎網罟難敢干議甘心
北虢忍恣吞嚼量肉揣毛以俟支剝貪謂常理可爲太息丈
人雖無身踐不能不取備屠門財帛之經盜手猶爲廉士所
棄何至引此滋味以汗腸胃乎是皆深疑三淨者又何承天
荅顏書云彼聖人者肇結網罟興累億之罪仍制牲牢開長
夜之罰此定不然宜簡淵慮雖高情愛奇想亦未至于侮聖
也梁高僧傳云求那跋摩謂宋文帝曰帝王出嘉言布善政
刑清役簡如此則持齋亦已大矣不殺亦已衆矣安在缺一
時之膳全一禽之命然後乃爲宏濟也是二說者誠辨矣梁
武斷肉其後北齊高元海棄官處山林修行釋典二年而歸

仕縱酒廣納姬侍詐不飲酒食肉勸文宣及後主奉佛天保
七年五月亦以肉爲斷慈不食後主亦斷屠宰惜二國政非
宏濟若聖人能安百姓又全一禽之命卽不云仁亦非有惡
各行其志何至侮聖如承天所難也惟梁以麪爲犧牲使鬼
神覩屠磔之形而無血氣之享北齊天保八年八月詔郊社
祫時祭皆仰市取牲牢是皆作僞生詐孔子云始作俑者梁
以之以作屠磔之形也大智度論云王舍城先有王名婆藪
言殺羊無罪生陷地中自是以來當殺羊下刀時言婆藪殺
汝也齊以之以其言非已殺也斷酒肉文云苾芻瞰魚食肉
避弟子同學白衣寺官懷挾邪志崎嶇覆藏方得一過或言

癸巳存稿

卷十三

三

靈石楊氏栞

肉非已殺亦復非嫌東坡志林云僧謂酒爲般若湯魚爲水梭花鷄爲鑽籬菜竟無所益爲欺而已日本不染居士護法資治論引羅山神社考云叡山僧爲鮒魚說法汝放不可生亦不可久汝身入我腹我心入汝身遂殺食之卽梁法亦無如之何大莊嚴經論云寡婦聽法心生染著比卽還俗殺羊生活言乎人貴立志否則敗也

度牒寺廟

度牒自唐天寶六載五月納銀祠部給之食貨志云天寶十四載祿山反乃遣使太原納錢度僧尼道士旬日得百萬緡明年又度僧道收貲東坡全集雜記人物云秦太虛有意爲

率交游間三十人每人十千爲祠部牒令鍾守素出家是宋
元祐間度牒有定價三百千也章俊卿羣書考索後集元豐
七年引著令度牒每道爲錢百三十千夔路至三百千以次
減爲百九十千其後金皇統五年慶壽寺天長觀度牒每道
折錢二十萬大定時許僧道進納賜宮觀名額合著錢一百
貫一百五十貫三百貫陝西高陵莊嚴寺有石刻禮部牒戶
部發賣所高陵慶安鄉幡竿村院僧狀告院無名額已納訖
合著錢三百貫乞立莊嚴禪寺名額勘會是實大定四年五
月牒河南修武眞清觀有石刻禮部牒據邱處機劉志敏狀
告修武七賢鄉馬坊邨道庵無名額于東平府納米請買到

日字號空名觀額一道乞書填眞清觀大安元年五月牒南宋紹熙三年閏二月甲寅則定僧道度牒價至八百千蓋免地稅免役文憑也其用之以募兵以修河隄以賑饑以給俸餉以充使臣路費以賞賜近戚幸臣如金幣順治八年

諭以僧道納銀給牒瑣屑非體以後永免納銀有請給度牒者州縣確查報司申部給發至乾隆初年度牒亦廢蓋以丁歸地則不須報牒免役也康熙五十年十二月丁卯

諭以除原有寺廟外其創建增修永行禁止今僧道造廟則題以重修字以避創建增修也其事古亦有之焦竑筆乘云瓦官寺依景定建康志應在秦淮南岸今寺乃因近詔毀私

創庵院黠僧假援舊名以自蓋者今僧又或藏古度牒以欺愚民自詡是官人又見一少年僧自言有度牒甚訝之索觀乃法源寺戒單是不知度牒爲何物也

回回教

天方輿地經云地圓體如球東至西作一直綫南北極作一橫綫距東西海岸等兩綫十字交者天方也如磨盤之磨當昆侖之陽阿丹聖人者盤古氏也生於天方至努海聖人洪太汜濫使其徒分治四方四方始有人民天方典禮云阿丹傳施師施師傳努海努海傳依卜拉欣依卜拉欣傳依師瑪依依師瑪依傳母撒母撒傳達烏德達烏德傳爾薩爾薩死

封印無教者六百年謨罕默特聖人出總前經卷百一十四種自作經六千六百六十六章則今同回教也其地王尙緣言天授山原草木正色禮官白刑官黑士民黃吏役青龍天方名都九十四無他教寺宇先是佛教及回疆謨罕默特禁絕之而母撒之後自爲挑筋教爾撒之後自爲天主教謨罕默特經曰甫爾嘉尼寺曰清真母撒經曰討拉忒院曰祝虎亦曰祝乎德寺爾撒經曰引支勒堂曰歐若亦曰天主教寺問之天主教則又曰不然天主回回佛各有其書務在相非其書先出而可采證者其唐已前佛國傳記乎

竈神

莊子達生篇竈有髻釋文云音結司馬彪云竈神著赤衣狀如美女史記索隱引司馬彪則云浩竈神也如美女衣赤李宏範音浩則莊子字不作髻然爲吉忌音者多荆楚歲時記云竈神名蘇吉利魏志管輅傳云王基家賤婦人生一兒墮地卽走入竈中輅曰直宋无忌之妖將其入竈也史記封禪書索隱引白澤圖云火之精曰宋无忌吉忌俱近髻又後漢書陰識傳注引雜五行書云竈神名禪字子郭衣黃衣酉陽雜俎則云名隗狀如美女又云姓張名單字子郭一云名壤子道藏太清部感應篇注引傳云竈神貌如美人有六女卽六癸玉女一云竈有三十六神又蘇吉利婦姓王名博頰張

單妻字卿吉六女皆名察治按禮器云燔柴於奧夫奧者老婦之祭也盛于盆尊於瓶注云奧當爲爨字之譌也或作竈此祭竈爲祭先炊老婦之義也許慎異義云竈神古周禮說顓頊氏有子曰犁爲祝融祀以爲竈神駁云五祀在四郊而祀火神于竈陞於禮乖也太平御覽引異義云竈五祀王者所祭非老婦駁云七祀竈神祝融然則盛盆尊瓶之祭是老婦矣諸書言竈神如美女者是先炊應經典也其竈神爲祝融又淮南子汜應訓云炎帝作火官死爲竈則自七祀竈神御覽又引淮南萬畢術云竈神晦日歸天白人罪說文走部趨云止行也一曰竈上祭名亦送竈之祭抱朴子亦云竈神

上天非是美女

祖神

檀弓云祖者且也方言云祖播也祖轉也風俗通云祖者徂也初學記晉嵇含祖道賦云或曰百葉遠祖風俗通云謹按禮傳共工氏之子曰脩好遠遊舟車所至足跡所達靡不窮覽故祀以爲祖神通典禮十一引白虎通云共工之子曰脩好遠遊舟車所至足跡所達靡不窮覽故祀以爲祖神今白虎通無之疑卽風俗通所案禮傳也曾子問正義云行神曰累宋書禮志文選詩祖餞注并引崔實四民月令云祖道神也黃帝之子曰累祖好遠遊死道路故祀以爲道神以求道

路之福選注無曰累祖蓋刪之漢書景十三王傳注白帖祖
載黃帝子注并云舊說黃帝子累祖好遠遊死道路故後祭
爲道神其說蓋出崔實與崔浩浩說見史記索隱索隱已非
之謂嫫祖黃帝妃無緣子又名累祖是唐本均作黃帝子而
雲笈七籤宋真宗御製軒轅本紀云黃帝妃嫫祖道死帝祭
之以爲祖神以嫫母爲方相氏則王欽若等飾非之言祖義
爲且爲徂爲搖爲轉則祖不爲人名義取導行亦取遄歸稱
含述百葉遠祖案昭七年左傳云公將往楚夢襄公祖子服
惠伯云襄公夢周公祖舊說謂周公襄公遠祖也鄭禮注言
行者之先其古人之名未聞見聘禮注則鄭不以爲遠祖亦

不以共工氏爲然其黃帝子之說尤不知也

祖祭

聘禮釋幣于行記曰出祖釋轍祭酒脯乃飲酒于其側注云祖始也行出國門止陳車騎釋酒脯之奠於轍周官大馭掌馭玉輅及犯轍犯轍遂驅之注云以菩芻棘柏爲神主祭之以車轍之而去說文云立壇四通樹茅依神爲轍大馭注云轍者封土爲山象詩烝民箋云祖者將行犯轍之祭說文云旣祭轍轍於牲而行所謂犯也秋官犬人共犬牲伏瘞幾珎沈辜轍蓋伏也大雅生民取羝以轍正義云天子用犬諸侯用羊禮相變大馭注引杜子春云祖道轍轍磔犬史記五宗

世家索隱言唐用黃羝或用狗以其血釁左輪用犬用羊皆有所沿也祭法七祀五祀有國行三祀有行月令冬祀行呂氏春秋孟冬紀注云行門內祭也蔡邕獨斷云行者在廟門外之西較壤厚二尺廣五尺輪四尺北面設主于較上喪祝之祖則在于庭曾子問正義引崔靈恩云宮內之較以祭古之行神城外之較以祭山川與道路之神是也

張天帝

酉陽雜俎諸臬云天翁姓張名堅竊騎劉天翁車乘白龍登天劉翁失治爲泰山守主生死之籍此當是張陵造作道書時議論檢道藏書未見也曾應龍開窗括異志云晉周興死

而復生言見天帝面方一尺問左右曰此張天帝耶荅曰上古天帝久已聖矣此近曹明帝耳此當是晉中衰時議論陳耀文天中記引晉書云晉咸康中士人周謂云云今晉書不見王世貞宛委餘編云出殷芸小說亦未見其書其語雖荒誕然可徵人心向背邇言必察有明訓矣

陳武烈帝祠

江西陳武烈帝祠極顯靈嘗散步祠中若有所犯齋戒拈香乃愈江西通志云武烈廟祀陳江西巡察大使陳果仁或作果仁或作仁果皆依其文書之有賑荒之惠唐封忠烈公南唐時以神兵助戰冊加武烈帝南昌縣志同又沙河廟懸榜云神字

世威江南常州府晉陵縣人也仕陳江西觀察使主鎮江南
隋時爲司馬天下大亂集兵以保境大業五年授朝議大夫
十三年隋改號義寧拜大司徒唐武德二年薨封忠烈公進
福順武烈王後周加帝宋乾德二年神見于士步門以船粟
賑飢宣和四年封福順武烈顯靈昭德大帝其言不可信常
州祠有唐天寶時僧德宣作隋司徒陳公捨宅造寺碑云陳
公諱果仁字世威其先潁川人六世祖陳武帝家于長城故
爲晉陵人祖曷陳羽林郎將父季明陳江州司馬兼嶺南道
採訪使終給事中公十八歲舉秀才對策陳文帝曰朕與兒
俱太耶後授監察御史尋遷江南道巡察大使大業五年奉

詔平長山寇授秉義尉尋授朝請大夫九年奉詔平江寧寇授銀青光祿大夫十三年奉詔平東陽寇召面見授大司徒沈法興自湖州起兵欲據常州與公結父子詐稱病公往問之中毒而薨時唐武德二年也享年七十有二文載全唐文中其言尤不可信碑榜所稱地道官階其時有無學者當能知之其大司徒又作左司徒江南通志辨譌云義寧中沈法興署爲司徒非因東陽功擢也余謂此譌不足辨卽言六世祖陳武帝亦是與武帝分派之脫畧碑言武德二年亦是三年之脫畧惟碑又言大唐詔詢晉陵耆老對以果仁梁大同中奉太守命斷晉陵義興太湖爭田據碑自言武德二年五

月十八日卒年七十二則以梁太清二年三月五日生大同中尙未生何得太守命斷湖田是唐時僧徒文字全無足信常州府志唐齊光父宋夏之文皆有碑記丹徒縣志唐顧雲有廟記宋人夢梁錄外郡行祠引宋會要云神陳仁果常之晉陵人仕于隋歷司徒沈法興謀叛忌司徒以食毒之神以矢射殺法興武進劉宗浩作武烈帝實錄云杲仁在隋立功歷司徒沈法興其婦翁也大業末法興欲襲常州懼公不敢動乃詐以疾告公往問疾中毒卒後法興方剽掠公見形黑雲中發神矢斃之大明會典八十五各處祠廟云常州陳司徒廟注云祀隋臣陳杲仁其言亦不可信神時屬法興不屬

隋且老矣不應與法興結父子又爲法興子壻神夫人檢江南通志爲軫氏保大中爲武烈后非沈氏常州府志云西廟祀武烈后軫氏贊幽夫人張氏沈明后沈氏是杲仁有三妻以就爲法興子壻之說法興據常久矣非以欲襲常始行毒也舊唐書沈法興傳云法興爲吳郡守煬帝使與太僕丞元祐討會稽賊樓世幹會帝被殺乃與祐將孫士漢陳杲仁執祐起兵又令杲仁破賊樂伯通法興自署江南道總管聞越王侗卽位乃上表自稱大司馬錄尙書事承制置百官以杲仁爲司徒新唐書沈法興傳云自東陽趨江都與隋元祐將孫士漢陳杲仁至毗陵襲據其城法興假越王侗自稱大司

馬錄尙書事以杲仁爲司徒士漢爲司空及侗廢法興于武德二年稱梁王改元延康是法興據常乃以神力神殺隋主將以從法興後人言法興欲叛隋據常故除神若以神爲隋之忠臣也者非神本意也後人作實錄作忠佑錄爲撰仕陳仕隋之事致薛應旂王錫爵諸公委曲其事陳而頌讚其仕隋者俱非神本意也妖亂志云高駢馬死圉人賂呂用之用之語駢曰適命隋將陳杲仁至淮東杲仁訴無馬以公大烏借之頃間廐白大烏死駢徐應之曰吾已借大司徒矣知唐末其祠甚顯武烈帝實錄云唐初詔爲立祠乾祐中以陰兵助裴瓌討王郢封忠烈公廣明之亂神力示顯賊不入浙西

加封感應梁開平中封福順王淮南楊氏封忠烈王南唐保
大時錢俶攻常州陰兵驅黑牛觸敵艦敵敗去乃冊爲武烈
帝宋又賜廟號曰忠佑徐鼎臣集有冊贈武烈帝碑文言神
高標明紀禮縉真王則梁所封也言吳越圍武進神祇助順
冥助昭灼唐主冊贈武烈帝則丙辰歲當周顯德二年也宋
陳彭年江南別錄云元宗時周師逼壽州錢塘乘虛圍我常
州命將軍柴克宏往救常州有故將陳仁杲祠克宏將戰夜
夢仁杲曰吾遣陰兵助爾及戰有黑牛二頭衝錢塘陳我師
繼之乃大破之斬首萬餘遂解常州之圍以克宏爲江州節
度使冊仁杲帝號諡武烈馬令南唐書同然則江州有武烈

祠自柴克宏奉之遂及南昌也今常州西廟南唐柴克宏宋
劉晏周杞從祀溧陽東門外忠祐廟則柴克宏從祀夢梁錄
外郡行祠引會要云仁和顯佑

佑祐亦隨
各文書之

廟唐武德時廟祀

封忠烈公梁加封福順忠烈王後周封帝號宋政和時賜廟
常州以帝號非禮易曰福順武烈顯應昭德王爲忠佑廟咸
淳二年臨安尹潛皋墅祈雪顯靈申朝賜爵遣吏緘詞送忠
祐廟又別告顯祐行祠咸淳臨安志云嘉定六年臨安以禱
雨靈應乞加封贈廟額曰顯佑咸淳二年京尹潛說友初郊
祈雨籤繇響荅其告謝祝文曰乃述顛末亟聞于上於是易
帝號以正季代之謬仍王爵以表大神之忠蓋梁時四字王

號南唐時二字帝號北宋之政和時以常州廟入祀典改入
字王號南宋咸淳時仁和行祠以雨雪徵應入祀典亦改王
王號他行祠在民間者官不問也故江西懸榜反謂宣和時
封八字大帝容齋隨筆有禮寺失職一條云予請封江神爲
帝禮寺不可今蔣廟陳果仁祠亦稱帝洪言蓋據江西行祠
其不檢政和時制卽詆禮寺爲失職甚非宜也洪所言請應
是紹興三十一年代葉義問請者太常寺言江神廣源王特
加六字作八字王其峻加帝號恢復中原日別議封冊其言
甚正也

亳州志木蘭事書後

大清一統志

第二次
修本

江南通志潁州列女俱云隋木蘭魏氏

女譙郡城東魏邨人也隋恭帝時募兵戍北方木蘭父當往而老羸弟妹稚乃請於父代行歷十二年樹殊勲人不知爲女子後凱旋天子嘉其功除尙書不受懇省親及還釋戎服衣舊裳同行者駭之事聞于朝帝召赴闕欲納之宮對曰臣無媼君之禮遂以死拒帝驚憫贈將軍諡孝烈按隋恭帝不得有十二年且其言臣無媼君之禮致以死拒大唐新語及唐書王峻傳言元宗以宮人賜郭知運及峻峻獨不敢取曰詎有嘗近閭掖而臣子敢當乎誓死以免守至于死其見蓋與木蘭同然如木蘭之言則公羊穀梁譏娶國中之說是大

一統者必求淑女於荒外也江南通志又云接十八陣出奇謀又云鄉人歲以四月八日致祭蓋孝烈生辰河南商邱縣志列女文亦然然潁州志及亳州志言魏邨人商邱志言商邱營郭鎮人湖北通志祠廟云黃陂木蘭廟在木蘭山下事見陵墓並詳雜記而陵墓雜記不載黃陂縣志則言木蘭將軍冢在縣北七十里木蘭山木蘭降箕卜自言縣人名勝志云木蘭邨在黃陂縣治北六十里其上有木蘭將軍冢木蘭者朱氏女直隸完縣志則言木蘭墓在完縣城東有元太子贊善劉廷直所撰墓碑木蘭爲縣人世所傳木蘭詩征戍往返略具惜唐書不載而韋元甫得此詩于民間宋魏泰臨漢

隱居詩話以爲曹子建詩者非也完縣木蘭廟唐有之杜牧
木蘭廟詩云彎弓征戰作男兒夢裏曾經學畫眉幾度思歸
曾把酒拂雲堆上祝明妃牧游河北時作或謂爲黃州刺史
時作亦非也商邱營郭鎮有孝烈廟金時自有文字元元統
二年邑人侯有造者作祠像辨正記言舊廟中鑪石刊金太
和時營城鎮酒都監烏林荅文稱昭烈小娘子宰相木蘭公
女也大殿塑像冠佩闈裝元統二年據完縣廟木像烏帽紅
顏服紫腰金乃增塑烏帽像於享殿仍存闈裝像及女侍七
像于後大殿易昭烈小娘子祠舊額爲孝烈將軍祠因言可
汗蓋劉武周之定楊可汗梁師都之始畢可汗梁師都迎突

厥居甘涼及河南朔方上郡地故其詩言可汗點兵以證木
蘭爲隋末唐初人且言孝烈乃唐諡其言如此或言可汗唐
太宗也貞觀四年稱天可汗唐興適十二年則長安歸殯不
當經完縣師都以唐貞觀二年平稱大度毘迦可汗者十二
年木蘭不欲爲師都所污託言臣不媿君以死徇之其自潔
其身以曲全其家族者用意至深其在河南朔方者蓋譙人
父子流寓葬於完者喪自師都所據地返未得至故鄉木蘭
詩不言死者初返役時鄉里矜奇之不及待後事而作也黃
陂木蘭冢據隋開皇十八年黃陂縣地置木蘭縣又水經漢
水云合旬水東過木蘭南注云左岸壘石數十行重疊數十

里爲木蘭塞洵陽縣志云縣西五十里伎陵城卽木蘭寨蜀
救孟達之所凡地名山名皆以樹不關人也商邱營郭鎮本
金人祀木蘭宰相女昭烈小娘子者元時士民以地近亳而
改爲孝烈廟寫完縣墓廟木像乃言木蘭卽其鎮人各志言
除尙書則詩所言不願尙書郎鄉里夸飾詞耳元明人以其
時制尙書冠服被之後人景仰古賢者大抵傳裨若此木蘭
蓋亳人葬于完完志言完廟歲旱潦失常有禱卽應邦人降
神盤桓水面驅人風飛是誠有功德于民宜祀享其代父爲
師都戍而不肯入師都宮則孟子言往役禮也往見非禮也
眞所謂女士也因亳州志未能詳故論之

鄭樵集紹興十八年馮丞元肅重修木蘭陂記云集三百六十澗總而爲一斷大川之流析而爲二興木蘭之役者長樂錢氏女用十萬緡成之王圻續通攷云元仁宗時福州總管張仲儀建錢聖妃廟錢氏捐十萬緡創木蘭陂以護田救民陂垂成而敗錢氏投水死顧祖禹讀史方輿紀要云木蘭溪在府南七里木蘭山下錢氏媼築坡本名將軍山下將軍灘福建莆田縣志云木蘭陂宋治平元年長樂錢氏室女傾貲築坡士女立廟崇祀此木蘭以孝烈起名者或曰木蘭陂或曰將軍灘或曰木蘭山或曰將軍山知孝烈將軍之號古人徧用之矣附記之亳州志後嘉慶

癸巳存稿

卷十三

三

連筠簪叢書
靈石楊氏聚

丙寅夏六月德州

唐通眞三太子神

黟記唐封中書舍人通眞三太子卽唐張巡也明咸寧縣志云通眞太子廟在安遠門東街祀唐忠臣張巡洪武十三年建有記嘉靖時咸寧胡傳眞珠船云陝西會城糖坊巷有太子廟所祀乃唐張巡廟碑云唐嘗贈巡爲通眞三太子山西通志云平陽府晉山書院卽三太子祠知其說始北方唐書張巡傳云開元末擢進士由太子通事舍人出爲清源令知其致誤之由矣或撰神聯指爲昭明太子宋趙彥博知池州作昭明太子事實二卷廟食于池元祐時賜額文孝黟自有

文孝廟由貴池秀山來墨莊漫錄所謂英濟王封于唐開成時者此自通眞三太子非昭明英濟王也池人亦兩太子各祀池州府志疑通眞三太子爲清源之子卻又非也又陸錫明新安氏族攷云唐新安郡王李嶽武后時爲酷吏羅織死有二子曰通靈曰通眞亦與其難國人哀之爲立太子堂其事見唐書濮王泰傳而無通眞通靈之說說出胡氏譜新安有安定胡有李胡宋末婺源胡次焱者有文集十卷自言出唐宗室五代時育于胡因從其姓不言嶽後黜祀三太子亦於嶽無與也

張王神

趙吉士徽州府志云黟五侯閣在二郎橋上祀張許二侯及賈南雷三將軍尋志不載二郎橋卽今橫溝上張王閣也張公巡與許公遠唐卽合祀謂之雙廟宋史劉摯傳云應天府閔伯微子廟又有雙廟乃唐張巡許遠張舜民柳行錄云過宋州雙廟中祀張許及南霽雲姚閭雷萬春宋州人亦謂之五王廟撫青雜說云紹興辛巳冬劉琦小校何兼資至六合西見張巡許遠南霽雲雷萬春從天蓬神將兵左張巡鬚髯皆指天右爲許遠亦俊爽則張死如其志作厲鬼殺賊大明會典八十五各處祠廟云歸德協忠祠注云祀唐臣張巡許遠配以雷萬春南霽雲姚閭賈資四人張公故又別有專祠

言宋封東平威烈昭濟顯慶靈祐王太湖縣志云宋宣和間縣人石姓黃姓者客東平無罪陷獄禱于神既得脫乃匿像以歸祠主追之敢篋乃變爲簋至太湖西十里棠梨樹下二人假寐夢神言欲居其地乃爲立祠祠成神示卦有云我乃張巡與許遠同時在東嶽爲押案爲陰司都統使黃岡縣志云明正德時黃州守盧濬毀淫祠南門外安國寺右景祐真君廟亦在毀數忽降神門皂書言是張巡充東嶽押案鄧都獄推其階爲忠烈大夫又直達萊殿在人間爲景祐真君遂得不毀黃陂縣志以爲縣東一里雙忠祠盧濬時神附擔水婦人屬筆留詩蘄水縣志亦有此事云是巴河睢陽祠萬麻

十三年知縣閻士選刻之石建寧徐時作閒居偶錄云其邑鳳山東嶽廟祀張睢陽建寧亦祀張睢陽者蓋以東嶽押案之說又與登寶庵左祠皆有廖氏雙像又永安鎮張王廟有五人阻祭賽費皆死時作非妄語者蓋神必有託以傳又張自言願爲厲鬼殺賊厲卽瘟神都天今丹徒句容都天降福元帥祠亦張公也元武進謝應芳厲鬼辨云無錫人出郭遇神赤髮青面吻出四牙狀貌詭異曰此張巡也皇華紀聞云宿松棠梨宮南昌吳城鎮今屬新建皆有張睢陽廟其像皆青面赤髮狀極獍惡筠廊偶筆云常熟方塔寺青魑菩薩卽張睢陽赤髮青面口銜青蛇如夜叉像蓋從神志也會典事例云

乾隆十二年封浮梁張巡神爲顯佑安瀾之神嘉慶八年封丹徒張巡神爲顯佑安瀾寧漕助順之神則張又兼司水矣司水曰張大明王俗稱牛肉菩薩以水德在亥祭不用亥禽猪也廣德州志言神事甚詳乾隆四十五年定名司水張公之神許公于宋雍熙時專祠于海寧每歲十月十六忌日官祭雍正九年封威顯靈佑王祠於山陽之高堰從張許祠者南霽雲亦有專祠黔書云貴陽有黑神廟祀南霽雲居易錄引朱近修云雲同行王扞黔陽有祠號昭烈王

康王神

宋史四百四十六卷忠義一康保裔傳云洛陽人歷任登州淄州定州代州深州高陽關并代戰澤州廣陽石嶺關後戰

癸巳存稿

卷十三

三

靈石楊氏葉

高陽河間沒焉真宗紀云咸平三年正月契丹犯河間高陽關都部署康保裔死之今按其傳云其子繼英等奉告命謝曰臣父不能決勝而死陛下不以罪其孥幸矣上惻然顧左右曰保裔父祖死疆場身復戰沒世有忠節深可嘉也蓋保裔戰沒後死于契丹非死于行間其爲死事則同也謝德權傳云咸平六年葺蒲陰城乘傳詣闕言前歲傳潛閉壘自固康保裔被擒傳潛傳云潛爲行營都部署使范廷召等逆擊契丹康保裔戰死皆實證也其前一年有康昭裔之事遼史聖宗紀云統和十七年十月次瀛州擒宋將康昭裔十九年六月乙巳以所俘宋將康昭裔爲昭義節度使則昭裔被擒

在咸平二年與保裔事別老學庵筆記則云康保裔死事在咸平二年十月混二事爲一致啟後人之疑案保裔祖志忠後唐時定州王都反戰歿父再遇又戰死于澤潞保裔又戰死于河間世以戰歿昭裔蓋亦志忠再遇子姓陷于遼實事不當諱老學庵筆記既移咸平二年十月之被擒爲死事葉隆禮契丹國志止記三年正月保裔之死而不記二年昭裔之事宋史亦同該餘叢考云一康保裔也宋史作康保裔遼史則曰康昭裔亦以二人爲一是愈啟後人疑也江西泰和縣東門外有康王廟歐陽守道記云眞宗時郡縣請王封號者卽報可南渡以後尤著靈則宋時江西已爲保裔立廟泰

和縣志又云康王廟或言唐時建疑之蓋唐時古廟基也建昌縣亦有康王廟志云保裔有德于建檢保裔三代未曾至淮南何由有德江西鄱陽縣亦有康王廟在城中福州福清縣連江縣俱有康王廟在東嶽廟左祀康保裔新建縣德勝門外一鋪有康保裔廟土人以木郎廟張巡併入祀之額曰康張福地上高縣有冲真廟云廟自洪武時建中祀張巡許遠康保裔是張巡康保裔合賽之證黔書云麥新縣祀宋康保裔其神介冑赭面今黟城中賽張康神張爲厲狀康赭面謂之老菩薩亦曰張王康王又按劉宋元嘉時劉子卿事廬山已有康王廟進賢縣壇石山康王廟則志云或曰周康王

或曰楚康王或曰宋康王或曰康佑或曰康保裔山西介休縣康王廟則祀唐康太尉深又嶺南雜記高州建太平醮于門外壅土爲神設蔗酒祭之名曰康王不知何神矣

黃大王傳

黃大王名守才字英傑號對泉偃師南鄉夾河王家莊人明萬曆三十一年癸卯歲十二月十四日辰時生

運河紀略謂生於戊戌年

生而神奇空中有若言河神者失父母育母舅劉氏家方歲餘表兄抱之出墜于井兄驚馳去呼救人至則兒坐嬉水面若有戴之者弱冠至濟源天壇山中十方院值歲旱不得水守才指地使鑿之得一泉引之遂不涸爲山田灌溉利今十

癸巳存稿

卷十三

罕

靈石楊氏葉

方院不老泉是也時天啟五年守才年二十三人固已傳其生時神奇遠近異之矣嘗隨舅船至虞城張家樓有糧船二百滯河沙不得動初夜運官吳姓者夢人告之曰沙壅不開明日有劉船至中有黃姓者河神也彼言開卽開矣船至吳以誠投之守才勉至頭船助之執篙船俱開去守才每瞑坐久之自言如夢至某地誤踢壞幾船好事者以其言求之地與事皆驗其生爲神人皆知之崇禎十五年官軍決朱家寨賊決馬家口後工部侍郎周堪廣修決口不成至偃師請守才爲乘舟插楊枝于決口依築隄成初闖賊之欲灌開封也聞守才爲河神劫守決決馬家口馬家口決而水旁去賊

怒凶焰甚盛持守才他去不使在決口河水遂自城北門入
東南門出

國朝順治元年守才年四十二矣順治三年考城流通口決
四年河督楊方興聞守才神往請之守才至命於決溜中下
埽埽不動塞決甚易七年沁溢隄將潰參政分守河北道佟
延年亟請守才守才書一紙使拈香焚于沁水上水卽平蓋
神生人間若判官若走無常其在人間或有無祿位職役自
古有之非奇怪也懷慶人爲立生神主于城北迴龍廟八年
杞縣旱請守才禱雨得大雨杞人亦爲之生立廟康熙二年
癸卯歲十二月十四日申時卒于家葬縣南萬安山下雍正

癸巳存稿

卷十三

聖

連筠蓀叢書

十二年陳留曲興集建廟曰大王壇

賜名溥仁觀乾隆三年

敕封靈佑襄濟王歲祭以十二月十四日八年部頒祭文云
茲值誕辰之吉例展修祭之儀四十二年開封建黃大王廟
四十五年二月奉

旨爲修墳種樹於其子孫內擇一人爲奉祀生世傳勿替道
光八年四月以利漕奏請懸扁

加封顯惠十一年五月以利漕

加封昭應是爲靈佑襄濟顯惠昭應王十六年十月請

御書聯對河南河工皆有神應見章奏是祀典也今清江浦

南臨清堰東有黃大王廟曰靈佑觀神每見託形小蛇喜觀
優偏好河南羅羅腔每出見則人立竿於盤置盤案上蛇蟠
竿翹首聽戲凡神見皆然

論曰河南府志仙釋偃師縣志逸事王文簡池北偶談皆有
神事懷慶府志有河神黃大王傳皆不詳黃運兩河紀略中
有大王曾孫黃大成所作傳甚詳讀抱朴子言馮夷以八月
上庚日溺河文選思元賦注引清冷傳河伯華陰潼鄉人姓
馮名夷浴于河中而死是爲河伯又引高誘淮南注馮夷華
陰潼鄉隄首人喜古人有好事于神明址貫俱記之故采黃
大王事惟大成記以小孩黨住兒塢入埽取義攜得住不可

癸巳存稿

卷十三

聖

連筠簞叢書

爲訓而廟中實有穩婦黨將軍配享所謂流言不實傳爲丹青者讀

皇朝通考羣祀考

大清會典禮部祠祭司有神名貫爲蔓輯傳信焉

丙申十月十日與新城陳淮生行臨清堰上謁神僚像用唐衣冠似宜改依禮制又謁天后祠有睡像以爲當用火居道士住持道士婦承直則人神俱安過五壩三闌得兩神佑余于辛卯冬作黃傳今六年始至其祠因記所見于此儻有力者能遂神願也是夜記于彭家馬頭舟中

天帝釋大人

阿修羅一作阿須輪一作羅刹一作羅睺羅增一阿含經云
劫末光陰諸天入水洗浴四大精氣入其身內體生觸樂精
流水中自然成卵八千歲生一女入海拍水自戲水精入
體八千歲生男爲毘摩質多羅阿修羅王長阿含經云修羅
生女端正生男多醜校修羅不信佛佛云醜者雄傑也多端
正者羅刹女也今洋畫西洋美人是也後人以羅刹男概之
亦謂女醜者爲羅刹女不知佛正以美女爲羅刹女佛本行
集經五百比丘因緣品云羅刹女可喜過人才不及天或作
童女或作不久嫁形不必真是羅刹女神鬼魔幻佛借羅刹
名之如中土稱美人爲姬不必是姬姓女也妙法蓮花經陀

羅尼品有羅刹女藍婆毘藍婆曲齒華齒黑齒多髮無厭足持纓絡臯帝奪一切衆生精氣十人詣佛說咒護持法華其取名奪一切衆生精氣尤見其妖冶羅刹女有最豔爲佛國所稱者毘摩質多羅阿修羅王孫女嫁爲天帝釋憍尸迦妻者也觀佛三昧經云毘摩質多羅阿修羅王有兒聘香山神乾闥婆女爲婦懷妊經八千歲乃生一女其女容顏端正挺特天上天下更無有比面上姿媚八萬四千左邊右邊各有姿媚八萬四千前後亦爾阿修羅兒以爲殊異如月處星甚爲奇特憍尸迦聞求以爲妻阿修羅喜以女妻之帝釋立字號曰悅意諸天見之歎未曾有視東忘西視南忘北乃至毛

髮皆生悅樂帝釋憐尸迦至歡喜園共諸采女入池遊戲爾時夫人愍意卽生嫉怒遣五夜叉往白父王今此帝釋不復見寵與諸采女自其遊戲此阿修羅王所由與諸天戰鬪又羅睺掩月妄談所自始也天者佛所謂富貴人悅意所遣五夜叉蓋所賤羅刹樓炭經叨利天品云帝釋舍采女獨將阿須大人游行則初寵悅意也立世阿毘曇論云天帝釋有四億九萬四千九百正妃三十四億六萬四千三百采女則歡喜園所將采女也天帝釋居須彌山起世經云須彌山東阿修羅王國土故連姻按阿修羅國土臨西海當今之俄羅斯西界地須彌居四洲中在此洲西當今之英吉利故羅刹言

山東嶠尸迦一作嶠尸陳一作瞿釋迦單字還音非佛也道古堂文引立世阿毘曇論疑于說佛儒生看佛書多不審恐爲有識僧徒所持故檢釋書正之佛經言須彌山日月出入繞之羅刹奄至其人高大山中人小爲所掩故言阿修羅捉月又月食光晦見魄佛疑別是一星借羅睺名之此捉月掩月佛國兩義分持皆起于天帝釋夫人之事

釋迦

魏書釋老志云所謂佛者本號釋迦文譯言能仁漢譯中本起經轉法輪品云惟昔先佛名曰定光拜吾佛名字釋迦文號如來晉譯等集衆德三昧經云錠光如來於往古授記于

佛來世當得作佛號曰能仁如來佛本行集經二商奉食品云佛言往劫世尊曰然鐙如來多陀阿伽度阿羅訶三藐三佛陀授記我名釋迦牟尼華嚴經如來名號品云或名一切義成或名圓滿月或名獅子吼或名釋迦牟尼或名第七仙或名毘羅遮那或名瞿曇氏或名大沙門或名最勝或名導師所謂仙者漢時譯如此以其第七佛卽云第七仙耳釋迦氏譜云釋迦能也文仁也華嚴音義世主莊嚴品釋迦能也一言尸棄具云尸棄那此言有髻或曰頂髻翻譯名義集選云亦名式棄大論翻爲火依言依光火三昧而成道一切經音義云牟尼或作文尼舊言仁應曰茂尼此言仙也則能仁

一義火依仙又一義又華嚴壽量品音義云阿彌陀正言阿彌陀婆耶此言無量壽法苑珠林云西言彌勒此言慈氏

佛眷屬

七佛父母姓字經云第一維衛佛一作毘婆尸佛剌利種子須越多健陀第二式佛一作尸棄佛剌利種子阿兜羅第三隨葉佛一作毘舍浮佛剌利種子須婆羅越此劫第一拘樓秦佛樓秦亦作留孫婆羅門種子鬱多羅第二拘那含牟尼佛拘一作迦鈴一作含婆羅門種子隨夷陀先那第三迦葉佛婆羅門種子沙多和第四釋迦文尼佛剌利種子羅雲七佛惟文尼書多說又不同佛說淨飯王般涅槃經云淨飯王

子名悉達卽佛也次子難陀孫羅雲弟斛飯王子阿難是爲
二支釋迦氏譜云淨飯王弟白飯王子名調達次名阿難白
飯王弟斛飯王子名摩訶男斛飯王弟甘露王起世因本經
云師子頰王生四子一淨飯王二白飯王三解飯王四甘露
王淨飯王子佛及難陀白飯王子帝沙及難提迦斛飯王子
阿尼婁陀及拔提梨迦甘露王子阿難陀及提婆達多是爲
四支史記大宛傳正義引浮圖經佛父臨兒國王屠頭耶亦
作闍頭檀母莫耶賢愚因緣經摩訶薩埵緣品云爾時大王
摩訶羅檀那今我父闍頭檀是則淨飯王名也依唐時官譯
剌利應作乞利唎悉達應作悉曇而釋氏書多作剌利悉達

大薩遮尼乾子受記經云如來父名白淨王母名摩耶乳母
名摩訶波闍波提瞿曇彌其謂摩訶波闍波提爲乳母言其
曾撫養佛應曰姨母亦白淨王妻所謂國太夫人卽摩耶親
妹菩薩本行經曰天臂城釋長者善覺生八女一日意卽摩
耶八曰摩訶波闍波提卽國太難陀母也則釋長者善覺爲
佛舅家而新羅沙門元曉阿彌經疏引聲王經說謂佛有母
是變化女非報身女爲無稽矣佛名悉達一日悉達多羅云
一作羅雲亦曰羅睺羅佛本行集經尸棄佛本生地品云羅
睺羅生日是羅睺羅阿修羅王捉食其月於剎那頃暫捉還
放之時故立此名五夢經云太子三如第一瞿夷父舍夷長

者第二耶檀一名耶輸父施移長者第三鹿野父釋長者佛
本行集經常飾納妃品云第一宮耶輸陀羅第二宮摩奴陀
羅第三宮瞿多彌智度論云菩薩二夫人一名劬毘耶二名
耶輸陀羅其說各異佛本行集經剃髮染衣品云車匿言聖
子正如耶輸陀羅貞潔之女因果經云大臣摩訶那摩女耶
輸陀羅爲太子妃釋迦譜云爾時釋種婆羅門摩訶那摩女
耶輸陀羅爲太子妃佛本行集經角術爭婚品亦同其瞿夷
一日俱夷一日裘夷亦曰瞿多彌普曜經云迦夷衛國釋種
女俱夷爲太子妃修行本起經云小國王須婆弗女裘夷爲
太子妃賢愚因緣經降六師緣品云摩訶賒仇利王子須陀

羅扇先爲多羅睺者今我身是彼時婦者今瞿夷是彼婦
公者今摩訶迦葉是則摩訶迦葉爲佛婦翁佛本行集經常
飾納妃品云毘羅城釋種大臣檀茶波尼女瞿多彌爲太子
妃是三妃眷屬也佛書錯言二妃生羅雲者互出五夢經云
瞿夷是第一夫人其第二夫人生羅雲者名耶維檀亦名耶
輸聖莊嚴陀羅尼經云淨飯王宮中羅睺羅童子母耶輸陀
羅普曜經云太子聞父王言卽以左手指其妃腹時耶輸陀
羅便覺體異自知有娠佛本行集經昔與魔競品云羅睺羅
母耶輸陀羅耶輸陀羅夢品云太子見日光沒已便其采女
行於五欲使樂歡喜相其聚集團繞而住其太子妃耶輸陀

羅卽於是夜便覺有娠又云耶輸陀羅夢二十怪異太子爲
欲安恤慰喻故以五欲共相娛樂更同睡眠尸棄佛本生地
品云耶輸陀羅念佛苦行脫種種寶香末花鬘皆棄舍之著
純白衣惟留一髻卧凡惡鋪所食粗澀才可活命六年計菩
薩證道還乃始莊飾羅喉羅生王欲殺其母子世尊手自作
書而白王言其所生兒是我之息願莫有疑王生歡喜心稍
分供給耶輸陀羅遊於園內立誓捉石擲於水中大石上浮
王生希有心加其莊嚴瑞應本起經云耶輸生羅喉羅又云
婦人情欲有附近心太子以好花及氎置中間婦不敢近侍
女疑太子不能男太子以手指妃腹曰却後六年爾當生男

佛本行經云耶輸陀羅往昔世遺母負重行六拘盧舍今於此生懷胎六歲是耶輸胎藏之報智度論云劬毘耶玉女不孕耶輸陀羅生羅睺羅牟融理惑論云佛年十七納妃坐則遷坐寢則異牀天道孔明陰陽而通遂懷一男六年乃生大唐西域記云太子寢宮有耶輸陀羅及羅睺羅像是耶輸生羅雲也漢譯未曾有經云瞿夷攜羅云晉譯生經佛說甥舅經云婦拘夷是子羅云是大薩遮尼乾子受記經云如來見世妻名釋種瞿夷子名羅睺羅普曜經云裘夷生羅睺羅大善權經云瞿夷生羅雲又云防人疑懷菩薩非男故納瞿夷慧止菩薩經云佛言過去燄光入沙竭國有陶家女投燄光

言不從欲吾當自殘骸光卽從女所欲骸光則吾身陶家女則瞿夷也是瞿夷生羅雲也且普曜經兩言耶輸裘夷生子按佛說太子須大拏經云彼太子一男一女男耶利者今羅雲是女罽拏延者今羅漢末利母是則佛有女有外孫二妃一生子一生女耳方等般泥洹經云佛便持羅雲手阿難手著諸佛手掌中偈云面以此屬累天性不言空此其所以神也

紫姑神

歲華紀麗上元注云異苑紫姑本人家妾爲大婦所妒正月十五感激而死世人於是日作其形於廁迎之曰子胥不在

曹姑已行小姑可出子胥壻也曹姑姑也荆楚歲時記十五日其夕迎紫姑以卜將來蠶桑并占衆事亦引異苑白帖卷四引同今本異苑及太平廣記所載者則曰曹姑其大婦也顯異錄云紫姑萊陽人姓何名媚字麗卿壽陽李景妾也大婦曹氏於正月十五夜陰殺之廁閒上帝憫之命爲廁神事物紀原謂時鏡新書引洞覽記云帝佶之女壻死生好音樂正月十五日可以衣見迎引爲紫姑事其法則稽神錄云正月望夜江左風俗取飯箕衣之衣服插箸爲嘴使畫粉盤以卜遊宦紀聞云請紫姑以箸插箕布灰棹上畫之皆男兒名字或系僧徒睽車志云臨安雨溪寨將請紫姑岳侯降之

夷堅志有台州祝氏子請紫姑溫州樂清縣弓兵請紫姑新建栗七官人請紫姑皆男子所爲唐李商隱正月十五日聞京有鐙恨不得觀詩云身閑不覩中興盛羞逐鄉人賽紫姑蓋男子賽卜之風久矣文昌雜錄有禮部謝侍郎及唐義問家二事夢溪筆談言博士王綸家有紫姑神集則女神也今蘇州有田三姑娘嘉興有灰七姑娘皆紫姑類

神婚嫁

博物志云太公爲灌壇令東海泰山神女嫁爲西海婦畏太公不敢以暴風疾雨過廣異記云唐崔敏愨入陰檢身得十政刺史遂輕侮神鬼爲華州刺史時人聞岳祠敕爲三郎迎

癸巳存稿

卷十三

辛

靈石楊氏葉

婦崔使君在州勿妄飄風暴雨不知神人嫁娶出入風雨而必暴疾者何也今農家及舟子占風暴多以神配之其神有極鄙誕者而其期多應非可以常理論矣靈樞九宮八風云太一移日天爲應之以風雨

癸巳存稿卷十三